


AKHALAKA,
AKHWAACA, AVITHIWAKA,
AHIHIMUWAKA, ARWAAKA

 Ennirowa ovikana etthu p'itthu naakhanly'ahu ohimyaka mwa ilavulelo s'atthu, wa moota mirima sahu sinoon'aya, olelo, vanthukuman'ahu va voosiis'ula, woottittimiheyaxa wooreerihiwa. Voosiis'ula onthoonyerya okathi etiini ahu yaakhalihiw'aya y'ekeekhai, okhala wira waari ohihimuwa wa Mwan'Inyu ooreerexa Yoowo aarwenle ovuluxa nloko nothene n'atthu. Nto hiyo nri va voosiis'ula mwa omutthapela, Pwiya yoowo, muulupale, ooweryaxa wuulupale oottittimiheya, onikhalinhe hiyo ooweryaxa oxintta okhwa, omooroni ni mahiye. Ni ninnooxukhuruni Nyuwo, simanly'aya ovira miyaakha iya sothene, nlelo ninnithukumana voosiisu oxaaka voosiis'ula wa Paasikha, wira nimukokhorele Yoowo, okhala wira ninnaamini wira Owo onnoorwa-tho.

² Nto ninnivekela wira Nyuwo munilevelele itampi sahu sothene ni soottheka sahu silempwe voonivirikanya, okathi onlap'ahu voowiiyeviha soovonya sahu, ni okupali ettipiheryo Awe itampi sahu. Nvonihe eretta eri eriyari ahu, Pwiya. Munikhaliherye okathi onsom'ahu Masu Anyu Oowaarya, akhanle ti mulipiheryo wa Ikeekhai sothene Nyuwo munihienry'anyu wira mwa seiyo nikhaleke ni naaminiki.

³ Ni khaninkelele paahi nikhuru nla nithukumanne va, masi othene mulaponi mothene, maana ninniwehererya ni maitho oohivilela ni mirima soowunkheliwa ni ohokolowa Wawe. Nimphwanyaneya olelo mw'epiphini, ni mw'evitikavitika, wira, okathi p'ukathi, wira namathipelela mmosa pooti omunanara etthu, ni arukunxe epitawu emosa yaamukhaani, nto olumwenku wothene waamuweryaneya ophuliwa kapattikapatti. Ni nooleeliwa ni akhulupale aalupale, wira, ekhotto enrowa opisa iwoora vakhani paahi, yatthikela-ru wiiraneya. Oh! Okhala wira, olelo nimphwanyaneya mukerekhere saana wa ekhotto ekina. Vano, Ekereja emphwanyaneya mukerekhere, ohihimuwa iwo woovuwexa, maana hiyo ninrowa okuxiwa vamosa n'ale oowaarya anrupa, wira nakumane n'Apwiya osulu, ni okhala ni Yaawo voohimala.

⁴ Hiyo nirwiiye wookokhorelani Nyuwo, Pwiya. Vano munaakhele olelo. Mureerihe osommwa wa Masu Anyu, wiipiwa wa masipo, olaleiwa wa Ehapari yooreera, mwaakhele mavekelo

aale a olapa. Mwiiwe mavekelo w'aretta, ni mphwanye ovuwa Mmansinyu, maana hiyo ninvekela vooiiyeviha mwa Nsina na Yesu, Mwan'Inyu. Amen.

⁵ Wa nyuwo mwaatthuna olepa nipuro nintthun'ahu osoma voosiis'ula, wa Soolempwa sahu. . .

⁶ Ni ninnikhupanyerya mwaha—mwaha w'osuwela wira khanirina opuro wookilaathi nikhuru nla nooreera n'atthu arwiiye oxaaka voosiis'ula wira ekokhorele ni hiyo, anikhuma ikereja soohiyana-hiyana ni istaatu soohiyana-hiyana, ni hata ilapo soohiyana-hiyana, athukumanne voosiis'ula va muTapernakulu, wo waakokhorela nno woovuwexa Apwiya.

⁷ Kintthuna mukhunle Eliivuru ya Masalmo, Masalmo 22. Koosuwela wira nla nipuro nohilimaleleyaxa osoma, wa muteko w'okokhorela wa Paasikha, masi Muluku t'ohilimaleleya.

⁸ Nto vano numala mutek'ola, ninoohiyererya voophiyaka ewoora emosa, wira nwerye orowa olya voosiisu. Vano nto muteko wa exikola ya Ttiminku onrowa opacerya ewoora ya neethanu na xexe ni minuutu miloko miraru. Vano nto naanaanoru numala muteko w'okokhorela wa Ttiminku, onookhala muteko w'opatiiso va va—vatankini. Vano nto oxekuw'ola, ewoora ya neethanu na mosa, ittikitti sa mavekelo sinookaiwa wa muteko w'ovoniha, wa ohiy'ula. Nto mwakhalana ale oophentiwa anwereiwa ni oothoiwa, muupuwele waaruaha ohiy'ula, ni, tthiri ola onrowa okhala okathi wookiserya okhanly'ahu okhalanaka oka—okathi vakhani, khula enamuna. Kinkhuma voosiisu, ewoora ya neethanu erumakaru, kinrowa oLos Angeles ni ovira Olimani Onkela nsuwa, wa miteko s'okokhorela soottharelana.

⁹ Vano mwa Masalmo 22, ninsoma.

Muluku aka, Muluku aka, mukinyanyalenle-ni? munipiseryani okikhaliherya, . . . ni moolumo aka ookhuwela?

. . . Muluku aka, kinninyakula othana, nyuwo khamuniwa; ni ohiyu, khuhiphwanya omumula.

Masi nyuwo m'owaarya, O nyuwo munkhala eriyari ya ottittimiha wa Isarayeli.

Azitiith'ihu yaahoororomelani: yaahoororomelani siiso nyuwo khuwoopola.

Awo yaanookhuwelelani, vano yaahaakiheriwa: awo yaahoororomelani, ni khayuwuliwe muru.

Masi miyo ka munku, nkiihiyo mutthu; ooveehiwa a atthu, . . . oothanyiwa n'atthu.

Othene ale anikiweha annikitheya wira ekinyemule: annittikinya eyano, ni annittikinya muru, yiiraka,

Owo ohaaroromela APWIYA wira amwaakihe: amwaakihe, woonaka wira onnisiveliwa mwa yaawo.

Masi nyuwo ti mukikuminhe mmirimani: nyuwo mukiroromelinhe kir'ene vatthirima v'ame aka.

Kiheliwe mwa nyuwo okhuma mmirimani: nyuwo mwa Muluku aka okhuma orupaliw'aka mu'ame aka.

Muhikikhalele ottaiwene; maana ovela-vela ori vakhiviru; khaavo onikikhaliherya.

Inari sinci-ene sinnikirukurerya: inari sa ikuru sa oBaxani sookirukurerya.

Aakaathamela iyano saya, ntoko kharamu onikhuura . . .onoopa mirukulu.

Kooyeehererya vathi ntoko maasi, . . .makhuv'aka othene aakokhonyowa: murim'aka ori ntoko oravo; wootothowa mmirimani mwaka.

Ikuru saka sihuuma ntoko nivali; . . .nlumi naka noophara mwaano mwaka; nto nyuwo mookipweha vantthupini v'ethaya.

Tthiri alapwa annikirukurerya: muloko w'alavilavi wookaattamela: awo aathorola matat'aka ni inawu saka.

Kinniweriya waalikela makhuv'aka: wira awo annikiweha ni annikilipelela.

Awo aakawelana ikuwo saka yaaworu, . . .nlaya naka ahaaxererya ehako.

. . .nyuwo muhikhale ottaiwene wa miyo, O PWIYA: . . . nyuwo ikuru saka, mukaakuvele mukikhaliherye.

Mwaakiherye munep'aka xoowa; ni oophentiwa aka ikuru sa mwalapwa.

Mukaakiherye mwaano mwa kharamu: tthiri nyuwo mookiwa mmanyakani mwa enari.

Kinimwaalaleerya nsina nanyu axinn'aka: mmithukumanoni kinimootthapelani.

Ayo. . .Nyuwo muniwoova APWIYA, mwaattotlopele; nyuwo othene osuulu wa Yakope, mwaavwihe; ni nwoove, nyuwo othene osuulu wa Isarayeli.

Maana khiyaathannye nnakhala khanyanyanle ohaawa . . .nnakhala khamurenrye ettuli; masi vakhuwenlyawe, awo yaahimwiwa.

Ovuwiha waka onookhala wa nyuwo mmuthukumanoni muulupale: kinommaliha natiri aka ohoolo w'ale animoova yoowo.

Ale oomaala animoolya evone: awo animwaattotopela APWIYA ale anaaphavela: murim'anyu onookhala mahiku othene.

Imalelo sothene s'elapo sinimuupuwela ni sinoothikela w'APWIYA: ni maloko othene a mulaponi animwaakokhorela yaawo.

Maana omvene ti w'APWIYA: ni awo ti mukhulupale a ilapo sothene.

Othene ale ari ooneneva mulaponi animoolya ni anoomukokhorela: othene ale ankhuruwela vatthayani anoomuuramela yoowo: ni khaavo onwerya okhaliha mukumi munep'awe.

Osuulu onoomurumeela yoowo; anoolaleeriwa Apwiya wa khula nloko.

Awo animoorwa, animwaalaleerya athu exariya awe ni ani . . . anrowa oyariwa, wira owo ohiira yeela.

¹⁰ Apwiya yincererye iparakha Saya osommwa wa Masu Aya. Kintthuna kikuxe wa okathi ula voosiis'ula, moolumo mathanu, nto mwa moolumo yaawo mathanu kimphavela woohimeeryani ele eri vamurimani vaka, nyuwo alipa-ookokhorela voosiis'ula. Kintthuna moolumo ala mathanu: *Akhalaka, Akhwaaka, Avithiwaka, Ahihimuwaka, Arwaaka.*

¹¹ Ni kinoona wira poweeta oohimya oratteene yeeyo munsiponi, ya ele entthun'aka ohimya, okathi olempy'awe nsipo nla.

*Akhalaka, Owo ookiphenta. Akhwaaka, Owo ookoopola.
Avithiwaka, Owo ooroiha itampi saka ottaiwene.
Ahihimuwaka, Owo ookhaliha naxariya mahala-ene voohimala.
Nihiku nlo Owo onimoorwa, oh, nihiku noovuwxaxa!*

¹² Khanatoko okhala makhalelo atonko okhala ntoko Awawe, okhala wira Owo aari Muluku oowiisooniherya mw'erutthuni okathi Owo oyariw'awe. Owo aari eyooniheryo ya ele Muluku Tithi okhanly'awe. Nto Muluku Tithi okhanle-ene mphento, vano Yesu aari eyooniheryo yoomalela ya mphento. Owo aari mphento okhuma okathi ene yoowo matat'Awe makhaani a ttuutthu yaakwannyal'y'aya malaku ooreera a mam'Awe. Owo aari mphento.

¹³ Nto kinoona wira olelo ti vaavo anci-ene anvonyaaya osuwela wira Owo aari mphento. "Muluku mphento, ni ale amphenta ayariwe ni Muluku."

¹⁴ "Muluku oophentexa olumwenku, ti wii, ale oohiphenteya, mpakha Owo onvaha Mwan'Awe mmose-ene, wira ole oni

omwaamini Yoowo ahipweteye, masi wira akhalane Ekumi ehinimala.”

¹⁵ Owo ohooniherya mphento Awe okathi Owo aary’awe mulaponi mu, mwa inamuna sinci-ene soohiyana-hiyana, mpakha ekhanly’aya yoohivaanyiheya wira Owo aari mutthu ookhalanexa mphento otonko okhala. Ni kinoona wira, mwa ekumi Awe va, Owo aamooniherya Muluku. Ni enamuna emosa paahi Muluku okhanly’awe wiisooniherya w’atthu enkhala ni ophenta.

¹⁶ Ni Owo aahiira saana yeela okathi aamukuxaly’awe mmosa w’axithiyana ootakhalex aakhanle a nihiku Nawe, alakela. Aaphwanyawe oottheke, ni voohikhala enamuna, okathi waaphwanyaw’awe araruwaka. Nto awo yaahimpurulela ohoolo wa Yoowo, khwira, “Nyuwu munihimya wira airihiwe exeeni?”

¹⁷ Nto okathi Owo omurukunuweny’awe, ni, khwira, “Miyi nkinoohukhumuni. Murooke muhittheke-tho.” Ohiya omurihela mphironi, wira apuruliwe ntoko nikhuru n’amwiici vasulu vawe, wira avonyakasiwe ni maluku ni okumiha ekumi awe; murima Awe woosivela, wooreera, woophenteya waahuuramela mutampini owo aary’awe-mo, khwira, “Miyi nkinoohukhumuni. Murooke paahi nto muhittheke-tho.”

¹⁸ Nto okathi Owo aarow’awe vamahiye va Lasaru, kinoona wira ole waari okathi mukina Owo ooniheny’awe ele Muluku okhanly’awe w’atthu. Kahi wira Owo Muluku paahi onwerya olevelela etampi ya vathi-xa yaakhanle wiiriwaka, ni waakuxa oottheke khwaakhalaha oohittheke, ni mphento Awe w’olevelela, masi numala okhwa onimaaliha, Owo nlelo onnicaliwa ni hiyo. Kinoona wira Owo aahooniherya saana yeeyo arowaka mphironi ni Marta ni Maria, okathi Owo ophiyaly’awe etthoko okhwa waamalihal’aya ekumi ya mutthu oophenteya. Ni ephiro Awe arowaka vamahiye, onamwi, ory’ene Muluku, aahisuwela wira aamurowa omuhimuxa mw’alipa-ookhwa, aahisuwela wira Owo aahileeliwa wira mwa Masu Awe waahikhala Owerya wira amuhimuxe mmahiye; nnakhala vo, okathi Owo omoonaly’awe Marta ni Maria n’ale yamphenta Lasaru, yinlaka, Bibilia ohimye wira Owo aahinla. Yaari exeeni iyo? Murim’awe muulupale wa mphento! Okathi Owo omoonaly’awe mutth’ule, ni Awawe—apatthani Awe yaaphwanyaneya mooxankani, Owo aahixanka ni yaawo.

¹⁹ Kinnitthapa osuwela wira Owo onniwerya ophwanyaneya eriyari y’ale ooriipiwa murima. Mmixankihoni mwahu, Owo kahiyo ole onrowa onihya. Owo onkhala mpantte ahu okathi sothene sinivonyaaya, ni miroromelo sookiserya sa soophwanyana sa mulaponi simmal’aya, Owo nlelo Muluku ni onniniphenta. Owo aari eyooniheryo ya Muluku.

²⁰ Nto, oh, moota onaamini aka wira Owo onwehererya wira atthu Awe ekhale ootikitthelaxiwa ni Eroho Awe, wira

niwerye waattamelana mmosa ni mukhw'awe mowehereriwani ni mixankiho, ni wooniherya okhupanyerya Wawe, okathi onikhwalal'aya okhuma mirima sahu siyariwe ni Eroho Awe, wira nooniherye mukereja mphento wa Muluku mukumi. Eyo yaahooniherya saana ele Owo ohimaly'awe, ahiiso poweeta ohimaly'awe.

Akhalaka, Owo ookiphenta.

²¹ Ohooniherya etthu Owo iireny'awe nloko nothene n'atthu, enamuna Muluku aithoonyenry'awe Mmansawe mwa Yesu Kristu. Owo ohooniherya muupuwelo Awe nloko n'atthu, waalevelela ni waaphenta ale yaari oohiphenteya. Ni kinniikoha, voosiis'ula wa Paasikha, moota ennihaleel'aya yeeyo. Naamuwerya waaphenta ale anniphenta, masi Owo ohaaphenta ale yahamphenta Owo.

²² Owo aari yuulupalexa, ethoonyeryo yoopacerya, ya mphento otonko okhalakhala arwaaka mulaponi; ni aahithanyiwa n'ale yaakhala mulaponi, w'ale Owo aaphentaly'awe. Khaavo otonko owerya ophenta ntoko Yoowo; ni khaavo otonko onyokhiwa ntoko Yoowo. Awo yaanimunyokha ni omuthanya Owo, ni omukhootta Owo, masi eyo khiyaamalinhe mphento Awe. Vookiserya, okathi Owo aathomeiw'awe vamwiikimanyo, numala ekumi ile Owo aakhanly'awe yahiirole hat'etthu woohikhala itthu sooreera, waalevelela ootheka, waavoniha aretta, ni itthu saari sooreera paahi. Okathi Owo aary'awe...imumulelo sookiserya vamwiikimanyo, ni osenyeliwa woonanara, woonyemula, w'ale yeemenle vaavale, wootthukeleliwa wiitho Wawe woorerihwa Owo aahikhuwela, ni murima woosareya mphento, "Tithi, mwaalevelele, maana khansuwela eniir'aya."

²³ Owo aaniwerya osuwela saana. Ory'ene Muluku, Owo onnisuwela saana. Mwaha wa yeeyo Owo aawery'awe oniphenta hiyo nikhanel-ene oohiphenteya, okhala wira Owo Muluku ni Owo onnisuwela saana. "Akhalaka, Owo ookiphenta." Khenatoko okhaliwa ekumi siiso, okhala wira yaaputaputeliwe moophentani.

Akhwaaka, Owo ookoopola.

²⁴ Okhwa, okathi omatta wEdeni, Muluku Yehova aaveakenly'awe, ehukumu ya etampi onkhala okhwa, nto khivaakhanle okhalaka ivirikanyihelo. Khivaakhanle okhalaka enamuna ekina, yoolikanyihwa. Okhala wira, Muluku ti muulupale, ni Owo t'ohimala, ni Mphuki a Erimu yothene ni vathi. Ehukumu y'etampi okhwa, ni khaakhanle hata mmosa aawerya omuliverya ehukumu ila mukina. Maana khula mutthu, hata aweryaka omukhwela mutthu mukina, masi owo aari ootheka opacerya wene. Khaakhanle hata mmosa a hiyo aawerya omukhaliherya mukina, okhala wira othene ahu naahittheka. "Hiyo nniyariwa mutampini, oopakiwa

mwa sootakhala, nirwiiye molumwenkuni noothaka.” Ni khiwaakhanle hata murayi wa nrromelo, hata nipuro. Hiyo naahilamuleliwa okhwa, ni Muluku, ni khula yoopattuxiwa etonko weetta mulaponi yaari vathi v’olamuliwa wenno. Vaaniweryaneya okhala athu a xariya yaakhumelela ni wira itthu suulupale, masi owo aari natampi opacerya wene.

²⁵ Yaari enamuna emosa paahi y’olinwa, nto iwo waari okhwa wa Muluku Mwaneene. Tivo Muluku, ary’ene Eroho, khivaaweryaneya okhwa, masi Owo aahikhuruwa mw’erutthuni y’ethayi khwiisooniherya Mmansawe mwa ekumi emosa ya mphento. wira akuxe ereerelo ele yothene Owo aary’awe, ni avahle voothuna ntoko Mukuttho muulupale, wira Owo akuxe ottheke wa namattheke. Othene ahu nry’ene anatampi, ni hata enamuna molumwenkuni wira noopowe. Owo khaarwenle paahi wira ooniwe mulaponi, masi Owo aarwenle okhwa ntoko Mukuttho.

²⁶ Apeele aahooniherya okathi anvahaly’awe Muluku mukuttho wooreerexa onvikana Kayini; okathi waamuruuhaly’awe mwaapwittipwitthi mukhaani, ni epantte ya mwiri w’eviteera muxikoni mwawe, mpakha vamwala. Vale aari mwaamukhaani vasulu vamwala, khurukunxela ereru awe yaamukhaani ottuli nto, ni mwa—mwala, khumana mmilo awe mwaamukhaani; nto owo anlaka ni akhwaaka, ni ephome evuuvaka, ni mikopwe sawe sikhaani soottelea khukhala soonaana n’ephome. Apeeli aahimooniherya Kalvario vale.

²⁷ Okathi Mwaapwittipwitthi a Muluku, iiviwe okhuma opattuxiwaka-ru olumwenku, aarwiiy’awe khukhala voopuroni va natampi oottheke, ni khuwammwa khunyakattiwa, ni—ni khunyemuliwa khutheiwa, khukhwa ekhwelo hata yoopattuxiwa emosa yaahaawery’aya okhwa woohikhala Muluku Mwaneene, nto mikopwe Sawe s’ephome silenleyaka mmakhatani mw’Awe, sittonyeryaka vathi, yaahooniherya moota etampi ekhanly’aya etthu yootakhalexa, okathi Owo aarin’awe okhwa wira anvuluxe mutthu mmakhaleloni mw’etampi. Khiivo yaawerya okhwa siiso. Khiivo yaarowa ovilela okhwa iwo. Ehimmwe wira, “Awo vathoronly’aya niparari Nawe, wira, yaahikhuma Ephome ni maasi.”

²⁸ Woovira okathi vakhani, kaalavula ni mutthu mmosa mwaha wa yeela. Ni aari nasiyensiya iirale, “Eri enamuna emosa eyo yaakhanly’aya okhumelelaka. Ni khiwaari mwaha wa nivaka na oRooma, Owo aakhwiw’awe; ni nnakhala khiwaari opweteya w’Ephome, Owo aakhwiw’awe, okhala wira nlelo yaahikhala Ephome mw’erutthuni mw’Awe. Etthu Owo okhwenly’awe, khiwaari mwaha wa nivaka n’aRooma wala ipereku saakhomeliwe mmatatani mw’Awe, wala ekhara ya miiwa awo yaahenly’aya mmuruni mw’Awe. Masi mwaha wa...Owo aakhwenle ohaawa, okhala wira Owo aarwenle ale Awawe vano Awawe khuhimwaakhela. Owo okhwenle

mwaha wo wiiniwa murima. Okhalaka wira, Owo aanisuwela soopattuxiwa sene s'okathi, Owo aarow'awe okhwela wira avuluxe, saahimusenyela wiitho Wawe, ni Owo aahikhoottiwa ni mutthu."

²⁹ Davidi, miyaakha imiya thanu na tthaaru ehinatthi okhumelela, aahikhuwela ni nsu nenlo Owo aakhuwenly'awe oKalvario, "Muluku aka, mukinyanyalenle-ni?"

³⁰ Etthu xeeni yowoopiha etampi eniir'aya, eyo ennimuvalaaniha mutthu ni Muluku! Ni Owo aari yoovaheriwa y'etampi jaarina ovaheriwa itampi sahu. Ni Owo aahivalaanihiwa ni Mukhalelo wa Muluku. Etampi yaahimuvalaaniha Owo. Muluku aamuhelenle itampi sahu Yoowo, vano Owo aahivalaanihiwa ni Muluku, nto mwaha wa yeeyo Owo aakhuwenly'awe, "Mukinyanyalenle-ni?" Nto okhala wira Owo aahinyanyaliwa, ni aahikuxa opuro ola, ni khuwoona atthu Awe, wira Owo aarwenle wira akhale Moopoli aya ni waavaha Ekumi, awo yaahimukhootta Owo, nto eyo yaahimwiiniha murima Owo, siiso, mpakha Owo okhala ooriipiwa murima mpakha Ephome ni maasi, ni ikiimika sa erutthu Awe, ovalaana.

³¹ Mutthu khankhalakhala asuwelaka exeeni yaari ile. Mwaha wa yeeyo vahaaweryaney'aya okhala mukina aawerya okhwa siisaale. Nkincala moota xeeni mwaakhanly'anyu ohaaxiwaka, moota saarow'aya oheliwa inawu sanyu mw'exaani, wala wookherani ni sarothi, kapatti-kapatti, wala opahiwa kapatti-kapatti; khimwaawerya okhwa ekhwelo ele, okhala wira epakeliwo anyu kehiyo ntoko ele. Owo aahaana okhala Muluku. Owo aahaana okhala, onvikana mutthu. Ni wuupuwela, wira, Muluku aahikhwa. Owo okhwiye ni murima woomuriipa, ni onwerya murima vanci-ene mwaha w'olumwenku, mpakha evirikanyelo ya kiimika wiiraneya mw'erutthuni mw'Awe yaahaarowa oweryaneya wiireya mwa nyuwo. Khamunwerya ohaawa siiso. Khiiwo hata enamuna ya nyuwo okhalana muthinto yoowo w'ehaawelo. Vano ori Mmosa paahi aawerya wira, ni Owo aahiira.

³² Vale ethomeiwe-ene, ekumi ile yooreerexa yaahaasuwela etthu woohikhala ophenta ni wira sooreera, yoothomeiwa vale eriyari ya Wirimu ni vathi, yoovenxiwa vale, yooruliwa ikuwo, yoophwanyihiwa ehaaya. Muupuwele moota nyuwo mwaarow'anyu okhala, ooruliwa ikuwo; khimwaarowa ophwanya ehaaya Muluku aaphwanyaly'awe, othomeiwe-ene vale. Koosuwela wira mwiikimanyo wookhalana etthu yaamukhaani, ntoko wira aaheliwe etthu mwa Yoowo, masi awo khiyampwehenrye eyo. Ele eheliwe vamwiikimanyo paahi, wala muratti t'ohenle vale. Awo yaahimurula Owo ikuwo Sawe. Owo aawanre nlaya, vano awo khukhera emurulaka Owo khimuttikhela cuuku. Owo aahiphwanyihiwa ehaaya, vootepaxa. Nnakhala vo, ory'ene Muluku, aahaana ovilela, ni

anatampi omusenyela wiitho Wawe. Nnya, ory'ene o—omalela weiwo wo wiisumaaliha, aahaana okhwa ohoolo w'atthu, ooruliwa ikuwo. Eyo khiyaareere omuukhula Owo, mpakha ovalaaniha maasi n'Ephome. Khivanxankiha...Kinoona wira poweeta oohimya oratteene okathi ohimaly'awe wira:

Eriyari ya miyala sooxinttiwa ni irimu
sooriipela,
Moopoli aka aahuuramiha muru Awe
khukhwa;
Masi ekuwo yoothukuwa ehupulula ephiro
Wa otthapa wa Wirimu ni nihiku noohimala.

³³ Vekeekhai, Owo aahaana wira. Ekuwo yaathomeiwe eriyari ya mutthu ni Muluku, nto ekuwo eyo yoothukuwa ehupulula ephiro ya opuha wa Wirimu ni ephiro ehinimala. Kalvario onnihimya etthu, onnihimya ovikana sinwery'ahu ohimya. Vekeekhai.

Akhalaka, Owo ookiphenta. Akhwaaga, Owo
ookoopola.
Avithiwaka, Owo ooroiha itampi saka
ottaiwene.

³⁴ Eyo yoohukhummwa vano. Etampi kherina-tho owerya. Okathi Owo okhuwelenly'awe vamwiikimanyo, "Yoomaliheriwa," etampi yaahikhwa! Vano eyo ehookhwa. Yoomalamala. Ti yoohiwerya. Kherina ekumi. Muupuwele yeeyo, atthu. Etamp'iyoy, nwanani a nloko n'atthu, ehookhwa ni kherina ekumi, kherina-tho eyiirelo. Khenwerya. Khivanxankiha nsuwa naattipihaly'aya eyoonelo aya, ittheneeri khisaanrye, elapo yaahiriipela, sothene sanvuluxiwa.

³⁵ Vano eyo ehookhwa, yoovithiwa, kherina ekumi. Kherina-tho ekumi mwa yeeyo, vano ehaana ovithiwa. Exeeni yaavithiwe? Erutthu ya Muluku yaahivithiwa, okhala wira yaari yoovaha mwaha wa etampi. Owo aari Mwaapwittipwithi oopahiwa, aapahiwe ni miyooro sa sootakhala. Mwaapwittipwithi ule oohikhalana etampi ahaasuwela hata etampi, Muluku yoole ahaasuwela hata yootakhala; Ekumi Awe yaahivahereriwa, nto vale yaathomeiwe yoovaha mwaha wa etampi. "Avithiwaka, Owo ooroiha itampi saka ottaiwene." Owo ohaana osikhiwa. Erutthu, yoovaha mwaha wa etampi ehaana osikhiwa.

³⁶ Mwaha wa yeeyo anci-ene, nuvira okathi vakhani, anrow'aya weetta, mmosa mmosa, erowaka vatankini va, wira epatisiwe mwa Nsina na Yesu Kristu. Mwaha wa xeeni? Etthu ehiiraneya. Eroho ele yaakhumme mw'erutthuni mme, okathi Owo okhuwelenly'awe, "Yoomaliheriwa," yoohukhumu etampi mw'erutthuni mwahu. Ni hiyo nihaana osikha, wira ehupuweliwe-tho. Kinnitthapa okhala siiso.

³⁷ Okathi etthu ensikhiw'aya, ti yoovithiwa, khenooneya. "Nto avithiwaka, Owo ooroiha itampi saka ottaiwene." Muluku

khonwerya-tho woona itampi sahu, okhala wira iyo soosikhiwa. Iyo sisikhiwe vayi? Mphareya mwa Eliyalelo. Muupuwele Ephareya ya Eliyalelo! Muluku khonwerya-tho wuupuwela iyo, okhala wira iyo sihookhwa ni soosikhiwa. Khisinweryaneya hata wuupuweliwa-tho. Iyo sookhuma mmuupuweloni mwa Muluku.

³⁸ Owo aari tho e . . . mwa “ovithiwa” nno Owo aathoonyerya Waataana Wa Khalayi. Awo yaakhalana piili . . . Awo yaakhalana yoovaha mwaha wa etampi vooreerihwani w’empa m’olompa. Nto yoovaha eyo mwaha wa etampi yaari wira awo yaakuxa ipuri piili, vano epuri emosa yaamwiiviwa; nto epuri ekina, itampi saaheliwa vasulu v’epuri yookhwa itampi saaheliwe epuri ekumi.

³⁹ Muupuwele, Yesu aari Epwittipwitthi. Owo aari Mwaapwittipwitthi, masi mwa mwah’ola Owo aahikhala epuri. Owo aari exariya okhala wira Owo aari Muluku, Epwittipwitthi. Masi Owo aahikhala epuri, etampi, wira akhale yoovaha ya etampi wa miyo ni nyuwo; okhuma Ewittipwitthi khukhala epuri.

⁴⁰ Nto Yesu aathoonyerya inama soopiili, ipuri soopiili: Maana emosa, yaakhwa—yaakhwela ettipiheryo; yanenli, itampi soottipihwa saaheliwa v’epuri ya ettipiheryo, nto epuri y’ettipiheryo yaanikuxa itampi s’atthu khurowa ottaiwene mothakoni, wira ekuxe itampi s’atthu. Yaari exeeni iyo? Waari okhwa ni osikhiwa wa Pwiy’ahu Yesu. “Akhwaaka . . . Akhalaka, Owo ookiphenta. Akhwaaka, Owo ookoopola. Avithiwaka, Owo ooroiha itampi saka ottaiwene.” Owo ookuxa itampi s’atthu mwa yoowo Mwaneene, khuroiha mapuro a vathixa a hades. Owo aari yoovaha mwaha wa etampi. Owo aahikhala itampi s’atthu. Owo ookhwela seiyo. Nave-tho itampi saaheliwe mwa Yoowo, nto Owo ooroiha itampi sahu ottaiwene, ottaiwenexa mpakha Muluku ahaawery’awe woona-tho seiyo. Nkuupuwelani yeeyo! Oh, Ekereja yaamuwerya okhuwela, “Aleluya mwaha wa Moopoli ntoko owo!”

⁴¹ Kahi wira itampi sahu sirooleveliwa paahi, masi soosikhiwa Mphareya mwa Eliyalelo, wira sihuupuweliwe-tho. “Avithiwaka, Owo ooroiha itampi saka ottaiwene.” Iyo khasinuupuweliwa-tho, maana khasikhanle. Iyo siri ottaiwene wa maitho a Muluku. Siheemexiwa. Iyo soomwalaniwa. Iyo sihoomoliwa. Muluku khonuupuwela-tho iyo. Exeeni? Ekereja yaahaana otthapa voosis’ula, osuwela wira itampi sahu khasinrowa-tho wuupuweliwa. Sooheliwa Mphareya mwa Eliyalelo, mmahiye woohikhala hata ohihimuwa. Iyo sihookhwa voohimala, ni sooliyaliwa. Siri ntoko wira khasinatoko wiiraneya. “Akhwaaka, Owo ookoopola.” Masi, “Avithiwaka, Owo ooroiha itampi saka ottaiwene.” Owo ooroiha ottaiwene saana mpakha sironw’aya Mphareya mwa Eliyalelo. Oh! Noosuwela wira itthu iyo vekeekhai ti soowaaminiwa eriyari ahu, ni vekeekhai ti Ekeekhai. Iyo Ekeekhai ya Muluku. Itthu

iy o sothene suulupale saari soovikana moolumo a mutthu. Khinaakhanle oweryaka ohimya oxukhuru wahu mwaha wa itthu iyo.

⁴² Masi, oh, Paasikha ole! “Ahihimuwaka, Owo ookhaliha naxariya mahala-ene voohimala.”

Akhalaka, Owo ookiphenta. Akhwaaka, Owo ookoopola.

Avithiwaka, Owo ooroiha itampi saka ottaiwene. (Eyo yaari saana.)

Masi, ahihimuwaka, Owo ookhaliha naxariya.

⁴³ Waari exeeni ohihimuwa? Yaari eyeemereryo ya Muluku, wira ekontha yoolinvwa. “Ahihimuwaka, Owo ookhaliha naxariya mahala-ene voohimala.” Oh, Moopoli xeeni, ahihimuwaka! Muluku iirale exeeni? Mutthu onoowerya ohaawa, mutthu onoowerya okhwa, mutthu onoowerya ovithiwa. Masi Paasikha aari muulupalexa a iyo sothene, maana aari elipiheryo ya Muluku, “Ikano Saka soomaliheriwa, soovekela Saka soomaliheriwa, owo ti Yoowo!” Owo aahimuhihimuxa mw'alipa-ookhwa! “Ahihimuwaka, Owo ookhaliha naxariya mahala-ene voohimala.” Nttotopeliwe Nsina Nawe Noowaarya!

⁴⁴ Khivanxankiha oruhaka othananiha! Khivanxankiha murima wa mutthu ohiweryaka wuuraanya! Oh, ni waamini wahu woxxintta ninniweya weemela iwe ni wira, “Hiyo nookhalihiwa naxariya voohimala, mahale-ene,” okhala wira Owo aahikhwa khuvithiwa, nto Muluku khumuhihimuxa voosiisu wa Paasikha. Vano, Muluku aahooneherya wira Eyo yaahikupaliwa, itthu sothene Owo iiraly'awe. Itthu sothene soolinvwa mahale-ene, munoowerya orowa ootaphuwa vano! “Ahihimuwaka, Owo ookhaliha naxariya mahala-ene voohimala.” Oh, khaavo onwerya okhalakhala asuwelaka, onwerya okhalakhala uupuwelaka nihiku nle nuulupale Owo aahihimun'awe! Ni Malaikha yaahoono eyo. Wirimu wa irimu, Malaikha yaahiipa mittotopelo sa Muluku, ni yaahitthapa; okathi ale oowaarya a Waataana Wa Khalayi, oParastiiso, yaakhuwel'aya, “Aleluya!” “Ahihimuwaka, Owo ookhaliha naxariya.” Erimu yaahittikinyeya, elapo yaahittikinyeya, eparatiiso yaahittikinyeya, ni Erimu yaahittikinyeya, okathi Nsu nle nuulupale naalavunly'aya. Mmahiye Owo aahihihimuwa! “Ahihimuwaka, Owo ookhaliha naxariya mahala-ene voohimala.” Oh, wulu!

⁴⁵ Vano ale oowaarya ankhwa mwa Yoowo anoowerya wiipa ela, naawehaka mahal'ale oowunnuwexa, iwe, Owo iiraly'awe. Munnona? Elipiheryo yoomaliheriwa ya Muluku! “Woohala okathi vakhani olumwenku khunrowa okoona-tho, nave nyuwo munookoona, maana Miyo kinoohihimuwa mw'alipa-ookhwa ni kinookhala ni nyuwo, hata mwa nyuwo, mpakha omala

olumwenku; ntoko elipiheryo, ni eweheryo wira Muluku ehimaly'awe ekeekhaii, ni enihimy'aka ekeekhaii," Yesu oohimya. "Miyoo kinimoorwa mwa mukhalelo wa Eroho Yowarya. Kinoopaka etthoko Aka ni nyuwo, ni okhala ni nyuwo mahiku othene." Nto ale oowaarya arina nrromelo owo w'ohihimuwa mmurimani mwaya, anniwerya wiipa nsipo nla.

Voosiis'ule woohikhala meeku ale akhwiye
 mwa Kristu anihihimuw'aya,
 Ni ovuwa wa ohihimuwa Wawe waavaherya;
 Ale oothanliwa Awe anthukuman'aya
 Owannyaya ovikana erimu, (ni nrromelo
 wooloka, ni Ekanyeryo ya Muluku, ni
 eyeemereryo yoolempwa ya Muluku
 Mwaneene)
 Okathi onkhal'aya wiihaniwa, kinookhala-wo.
 (Oh, rwaakani naanaano!)

Oh, khivanxakiha awo ohimya:

Akhalaka, Owo ookiphenta. Akhwaaka, Owo
 ookoopola.
 Avithiwaka, Owo ooroiha itampi saka
 ottaiwene. Oh!
 Ahihimuwaka, Owo ookhaliha naxariya
 mahala-ene voohimala.

⁴⁶ Itampi sooleveliwa. Mikuttho iye sothene saamuweryaneya okhala ethale, mikuttho iye sothene saamuweryaneya ovonya. Masi voosiisu wa Paasikha, okathi Owo ohihimuw'awe, Muluku aahooniherya wira Owo aahikupali Yeeyo. Khivanxankiha, oruuhelaka murima wa mutthu mwa aleluya! Khivanxankiha waakhalihaka atthu weemela ohoolo wa okhwa! Enniwiiriha atthu wiihana ithu sahaakhanle, ntoko saakhanle! Masi mwaha wa xeeni? "Ahihimuwaka, Owo ookhaliha naxariya." Munsuwela sayi wira Owo oohihimuwa? Okhala wira, Owo oohihimuwa mmurimani mwahu, ookhaliha naxariya mahale-ene voohimala!

⁴⁷ Mahiku miloko mixexe ohoolo waya, okathi Owo eemenly'awe, alavulaka n'ana Awe, elemelelo khupacerya omala owerya waya. Miteko saahimalihiwa. Ehukhumu yaahilinwva. Owo aahikhalana eyeemereryo mmatatani mw'Awe. Yaari eyeemereryo ya Muluku. Owo aahikhalana aana, Ekereja, alipa-oowaamini. Etampi yothene yaahixinttiwa. Ephiro yaahikalihahiwa yoowooneya. Owo khaawerya-tho okhala elapo ya vathi. Exeeni ennivarelela mu? Elemelelo. Elemelelo khupacerya okwaseya, khurimeela owerya waya. Mwaha wa xeeni? Yaahimalamala nto. Exeeni yiiraneeye? Owo khupacerya ovenya okhuma elapo ya vathi.

⁴⁸ "Murowe mulaponi mothene, mwalaleerye Ehapari yooreera soopattuxiwa sothene," waari olavula wa iyano Sawe.

“Murowe mulaponi mothene, mwalaleerye Ehapari yoorera soopattuxiwa sothene. Ole onrowa waamini khupatisiwa onimooopowa, ole ohinrowa waamini onoolamuliwa. Nto ithoonyeryo iya sinimwaatthara ale anrowa waamini. Mwa Nsina Naka animoomola irooho sootakhala. Anoolavula ilavulelo isya. Yavara inowa wala owurya itthu siniiva, khasinrowa waatakhalaha. Awo yawiixaatherya matata aretta, awo anoopenuwa. Okhala wira Miyo ka mukumi. . . Elemelelo yookwaseya mwa Miyo. Etampi khiyaarina oxinta. Miyo kihookhwelani. Muluku ohooniherya, ni khuvaha eyeemereryo ya ohihimuwa. Nto okhala wira Miyo ka mukumi, ni nyuwo munookhala akumi! Nihiku nlo Miyo kinootthika.”

⁴⁹ Nihiku nlo Owo onimoorwa, oh, nihiku noovuwa! Vano, nimosa. . . Akhalaka, akhwaaka, avithiwaka, ahihimuwaka, arwaaka, nrromelo wa Ekereja olelo!

Akhalaka, Owo ookiphenta. Akhwaaka, Owo
 ookoopola.
 Avithiwaka, Owo oorooha itampi saka
 ottaiwene.
 Ahihimuwaka, Owo ookhalaha naxariya
 mahala-ene voohimala.
 Nihiku nlo Owo onimoorwa, oh, nihiku
 noovuwaxa!

Yaari exeeni iyo? Itthu thanu mwa ileetera thanu, Y-e-s-u.

Akhalaka, Owo ookiphenta. Akhwaaka, Owo
 ookoopola.
 Avithiwaka, Owo oorooha itampi saka
 ottaiwene.
 Ahihimuwaka, Owo ookhalaha naxariya
 mahala-ene voohimala.
 Nihiku nlo Owo onimoorwa, oh, nihiku
 noovuwaxa!

⁵⁰ Hiyo ninwehererya Orwa Wawe Wanenli!

Nto omosa wa voosiisu uwo woohikhala meeku
 Okathi ale akhwiye mwa Kristu
 anihihimuw'aya,
 Ni ovuwa w'ohihimuwa iwo evaheriwe;
 Okathi oothanliwa Awe anthukuman'aya
 mmawannyaya ovikana erimu,
 Okathi onkhal'aya wiihaniwa, kinookhala-wo.

Mwaha wa xeeni? Kookhalana eyeemereryo. Owo oohihimuwa! Munsuwela sayi? Owo onkhala mmurimani mwaka. Owo onkhala mmurimani mwa ekerej'Awe yoowaamini.

⁵¹ Muupuwele yeeyo, apatthani. Etanki enookhala yoolikana muhina mwa okathi vakhani paahi, ni maasi eekukuku, wa muteko w'opatiiso, nimalaka-ru othhika.

Nrowe nuurame muru ahu okathi vakhani.

⁵² Kinniikoha olelo, vakhala wira onookhala mmosa eriyari ahu, wala anci-ene ahinatthi nlelo ottittimiha Mukuttho ola voophiyerya wira ekupali Yoowo, ni mwaatthuna wira muupuweliwe mmavekeloni, wira Muluku alavule mwa enamuna y'omeekha ni murim'anyu, wira mukupali Mukuttho Awe, okukutthiwa wa munepa anyu.

⁵³ Ni muupuwele wira olelo hiyo nintthapela kahi paahi okathi wo owara ixapheyo isya ni owara ikuwo isya; ekhanle yoolikana, eyo ethooneryo wa etthu esya. Muluku ohiira etthu esya. Ekhanle yoolikana. Khahi yeeyo paahi. Paasikha khonihimya yeeyo. Wala, waaphavela anamarokolo a Paasikha wala mooce a namarokolo, ni alyakhu akhaani ootteela, ni sikina, owo kuhiyo ti muupuwelo, munna.

⁵⁴ Paasikha eweryelo, oxintta Muluku ovahaly'awe mulaponi, wira Owo oomuhimuxa Mwan'Awe mw'alipa-ookhwa. "Wira othene ale eni emwaamini Yoowo, ahipweteye, masi ekhalane Ekumi Ehinimala."

⁵⁵ Ohihimuwa onoowerya okhala mw'ekumini mwanu yeenyu. Mwaahikhalane, munvenxerye ntata Yoowo voosiis'ula, muuramme-ene muru, muhimyaka ela, "Muluku, mukuupuwele, wira Ekumi iyo ya ohihimuwa, kiwerye okhalana Eyo mmurimani mwaka." Munnitthuna ovenxa ntata wira, "Mukivekelele, Munna Branham, okathi kinivenx'aka ntata naka"? Apwiya yooreeriheni. Apwiya yooreeriheni. Ookhalatho iwo mukina ontthuna ovenxa ntata, wira, "Mukivekelele, munna, kintthuna kikipali Ekumi ila ya ohihimuwa"?

Voosiis'ule wowaarya woohikhala meeku,
(muupuwele yeeyo vano niry'ene . . . ? . . .) . . .

Kristu onoovenya,

Nto ovuwa w'ohihimuwa Wawe avaherye;
Okathi ale oothanliwa anthukuman'aya
olimani,

Okathi onkhal'aya wiihaniwa, kinookhala-wo.

Okathi onkhal'aya wiihaniwa,
Okathi onkhal'aya wiihaniwa,
(Vano mwaahikhale oororomela, mukhale
naanano, va.) . . . wiihaniwa,

Okathi onkhal'aya wiihaniwa, kinookhala-wo.

Nrowe ninvarele muteko Mwiiixuttihi
okhuma . . . (Ela ti yawinyu nyuwo
oowaarya.) . . . nsuwa,

Nrowe nilavule . . .

⁵⁶ Vano, nyuwo mukhanle aKristu, muntthuna ommanela natiri Muluku, wira nvaraxe muteko; murwe va, munvenxerye ntata Yoowo.

Nto okathi onkhal'aya wiihaniwa, kinookhala-
wo. (Apwiya yooreeriheni.)

Okathi onkhal'aya wiihaniwa,
Okathi onkhal'aya wiihaniwa,
Okathi onkhal'aya wiihaniwa,
Okathi onkhal'aya wiihaniwa, kinookhala-wo.

⁵⁷ Muluku Oophentiwa, Nyuwo muhoona khula murima mu, ni Nyuwo moosuwela mawoko ni soothuneya. Nto kinvekela omoreliwa ikharari. Muluku, munivahe, wira emoreliwe ikharari atthu ala. Awo ahoorwa voosiis'ula okathi ula w'okokhorela. Awo ahoorwa ni—nipuro nla wiiwa Masu Anyu.

⁵⁸ Ni ntoko silavunly'ahu, wira, okathi Nyuwo mwaakhal'anyu, khanakhaleke makhalelo ntoko Awinyu. Mukhwaaka, Nyuwo mwaari Mmosa Ole aawerya okhwa enamuna yeele. Okathi ovithiw'anyu, Nyuwo mooroiha itampi sahu ottaiwene; mwaahikuxa itampi s'atthu mwa Nyuwo, Nyuwo mooroiha Mphareya mwa Eliyalelo. Masi, muhimumwaka, Nyuwo mookhaliha naxariya mahale-ene voohimwala. Nto hiyo ninneemela, olelo, niwehereryaka Orwa Wanyu.

⁵⁹ Muluku, mwaareerihe. Munikhaliherye. Ninnisuwela wira khanirina-tho okathi, maana eri vamukhora paahi. Ni khula . . . Nto ewoora emosa okhuma vano, waatthariha alipa a siyensiya, vaamuweryaneya ilapo ohikhala-tho. Nto hiyo ninnivekela, Muluku, neemenle-ene, voosiis'ula wa Paasikha v'evittoni wa Orwa Wawe, nrromelo wa Ekereja. Anci-ene ikonto sene ampaathale iwe mutthayani v'elapo, elipelelaka okathi yoowo, minepa saya vathi v'altaari, ekhuwelaka, "Mpakha liini, Pwiya? Mpakha liini?" Kinnivekela, Muluku, wira Nyuwo mulavule ni hiyo. Ni munithuniherye wuupuwela wira hata wira niniira exeeni mulaponi mu, ti yooyevexa. Nto etthu emosa paahi nikhanly'ahu wira vano, owehererya Orwa Wanyu, ni waahimeerya atthu othene. Mutthaka ti wowaakuveya. Wira naaroihele atthu, vowaakuva, wira Nyuwo pooti orwa khula okathi. Ikapwitthi iyo awo anihimy'aya, ni misika iya, sinweryaneya okhala epula y'anci-ne aya ikonto sene amphwanyaneya mulaponi okathi wa minuutu mmosa; eyo ehinatthi wiiraneya, Nyuwo moohimya orwa, Pwiya, waakuxa atthu Anyu. Enrowa okhala siiso, Pwiya. Tivo, khula minuutu, waamuweryaneya okhala ohihimuwa, Paasikha wa Ekereja; ohihimuwa okhuma ekumi ila ya etampi, okela Ekumi Ehinimala, mwa Kristu. Mwiiwe mavekelo ahu.

⁶⁰ Nto olelo, naakelelaka miteko sikina s'okokhorela, wiixuttiha wa exikola ya Ttiminku, O Pwiya, mulavule-tho, ni wira mirima sinci-ene sikhale soolopoliwa wa enamuna y'omeekha. Ni wira awo erwe mwa ituusiya, mutankini mu voosiis'ula, voosiis'ula wa Paasikha, wira evithiwe ni Pwiya Yesu, akupaliki Mukuttho Awe. Voohicala ekereja xeeni

aniir'aya-wo mpantta, wala nnikhuru xeeni na etiini awo ampatthan'aya-no, eyo khenihimya etthu. Masi awo aakupali Mukuttho owo? Awo annihimya wira khahiyo ooloka, wira Yesu t'ari Ole ooloka paahi? Ni Owo oonikhwela hiyo, voopuroni vahu. Ni Owo ookuxa itampi sahu khuvitha, nto hiyo nimphwanyaneya mwa Yoowo paahi. Ikereja sahu khasinwerya osikha itampi sahu, makhalelo ahu yoohi khanwerya osikha itampi sahu, masi Kristu oosikha itampi sahu Mphareya mwa Eliyalelo. Muluku, nvaherye vano wira itthu iya sikhale soovuwa vamaithoni Vanyu.

⁶¹ Nto ohiy'ula, Pwiya, murwe mwa owerya w'ohihimuwa Wanyu, muttikinye nipuro nla naamukhaani ntoko nihinatoko aya ottikinyiwa. Wira ithoonyeryo ni mitikiniho siiraneye. Mutthikele, ntoko saary'aya Ittiminku piili sivinre, Pwiya, okathi aretta n'ale oohaaxeya yaavonihwi'aya vootepaxa oreera. Ninvekela wira ekhale-tho ohiy'ula, wa ovuwa Wanyu, Pwiya.

⁶² Munilevelele soottheka sahu vano, Pwiya, ni wira ola, akhale Paasikha eekeekhai wa amosa-amosa a hiyo, Paasikha eekeekhai wa hiyo othene. Nto amosa-amosa w'ale ahinatoko osuwela iye saakhanle iparakha sa Paasikha, okhale olelo Kristu onihihimuw'awe mmurimani mwaya, ni nrromelo musya, ni Ekumi esya. Mwaathoonyerye oKalvario. Vano hiyo ninvekela, mwa Nsina na Yesu. Amen.

⁶³ [Nipuro vahiitthu mufiitani—Mol.] . . . okhalana okathi ula w'opatthana. Akavi a nyuwo anaaphenta Apwiya? Nvenxe ntata paahi. Oh, wulu, ti yooreerexa!

⁶⁴ Kihiiwa wira mookhalana mwaana wira avahereriwe, Munna McDowell. Munootthika mwaha wa muteko wa exikola ya Ttiminku, munoowerya? Vaareera, enookhala yooreera. Owo okathi onrow'ahu waavahererya anamwane ni sikina, okathi yoowo, yaahookattamiheni, vaareera.

⁶⁵ Nto siiso vano, ninrowa olaxerya muthukumano okathi vakhani, wira murowe mmawannyinyu mwalye yoolya anyu ya voosiisu, vano muhokolowe-tho. Nootteeliwa murima mwaha wa nyuwo okhala va.

⁶⁶ Nto vano, nrowe nivenye. Ni nsipo nenlo naarin'ahu okathi vakhani ovinre, "Voosiis'ule woohikhala meeku . . ." Akavi arina nrromelo yoowo mwa yaawo? Nrowe niwooneni ovenxa ntata. Nvenye.

. . . wowaarya ni woohikhala meeku (Mwiipe vano.)

. . . okathi ale akhwiye mwa Kristu anihihimuw'aya,

Nto ovuwa wa ohihimuwa Wawe waavaherya;
Okathi ale owoopowa a mulaponi
anthukuman'aya epante ekina,

Okathi onkhal'aya wiihaniwa, kinookhala-wo.

Okathi onkhal'aya wiihaniwa,
 Okathi onkhal'aya wiihaniwa,
 Okathi onkhal'aya wiihaniwa,
 Okathi onkhal'aya wiihaniwa, kinookhala-wo.

⁶⁷ Vano, niipaka eversu enttharelana: “Nrowe ninvarele muteko Mwiixuttihi ahu, okhuma oxaaka mpakha nsuwa otupweela, nrowe nilavule,” (kahi itthu sa molumwenkuni) “masi, nrowe nilavule mitikiniho Sawe sothene, mphento ni okhapelela.”

Niraka yeela, nvahane matata ni mutthu ottuli wanyu, ohoolo wanyu, mpararini mwanu. Nrowe othene niire yeeyo vano. Mwiire, “Mooxeleliwa, mpatthani muKristu, kootteeliwa murima okhala mukereja ni nyuwo.” Vaareera.

Nrowe ninvarele muteko Mwiixuttihi okhuma
 e...
 ..mitikiniho Sawe sothene mphento ni
 okhapelela;
 Nto makhalelo othene yamala, ni muteko ahu
 malaponi omala,
 Okathi onkhal'aya wiihaniwa, kinookhala-wo.
 Okathi onkhal'aya wiihaniwa,
 Okathi onkhal'aya...
 ...wiihaniwa,
 Okathi onkhal'aya wiihaniwa, kinookhala-wo.

Mwaha wa xeeni? Ninrowa okhala sayi iwe? Okhala wira: “Akhala, Owo ookiphenta. Akhwaaga, Owo ookoopola. Avithiwaka, Owo ooroiha itampi saka ottaiwene. Ahihimuwaka, Owo ookhalaha naxariya mahala-ene voochimala. Nihiku nlo Owo onimoorwa, oh, nihiku noovuwa.”

Okathi onkhal'aya wiihaniwa, kinookhala-wo.
 (Nookhalana eyeemereryo.)
 ...l'aya...wiihaniwa,
 Okathi onkhal'aya wiihaniwa,
 Okathi onkhal'aya wiihaniwa,
 Okathi onkhal'aya wiihaniwa, kinookhala-wo.

Nuuramihe miru sahu.


⁶⁸ Pwiya, voosiisu wowaarya woohikhala meeku, noonaru ekhweyi yuulupale orwa osulu (Ethoonyeryo yo waataana ya Muluku, waataana ohinimala: Owo ommaliherya natiri Awe.), nto ninooweha, erwaaga, ni maluku a mmahiye anoomorela ottuli, nto ale anrupa vatthayani v'elapo anoohihimuwa wira ekawanye ovuwa wa Paasikha oopacerya ni Yoowo, Ole okhalinhe yooweryaneya, Pwiya'ahu. Ninnooxukhuruni Nyuwo mwaha wa yeeyo, Pwiya. Kinnitteleliwa murima, Pwiya, nrromelo owo okhalaka vatthirima vaka. Maana kinnoona makhat'aka emoraka, Pwiya, ni—ni wunnuwa opaceryaka

opuruleleya; kiri vasulu v'ethokani va mwaako, kiwehaka iwe vano. Pwiya, kinnitteeliwa murima wira nrromel'owo onniviha mwa miyo. Nihiku nlo Nyuwo munimoorwa. Kinnitteeliwa murima wira aakhala anci-ene va olelo anoona yeeyo.

⁶⁹ Kinnivekela, Pwiya, wira Nyuwo munivahe nihiku nuulupale, olelo, munilevelelaka sootheka sahu sothene, okathi onlap'ahu soovonya sahu, ni ohimya wira hiyo khanihiyo oophwanela. Masi okhwa wa Kristu, ovithiwa, ohihimuwa, woonooniherya ni Eroho Awe wira oohihimuwa mmurimani mwahu, anikhalihaka wira mpantte wa ohihimuwa Wawe, ni nookhalana neemexeryo na ohihimuwa wahu mmurimani mwahu vano. Okhala wira mwa etampi, hiyo nihookhwa, ni nookela mw'Ekumini esya, ni noohihimuwa mwa itthu sa khalayi sa molumwenkuni nikelaka Ekumi esya. Nlo neemexeryo, oliva woopacerya, O Pwiya, nlo—nlo neemexeryo na ohihimuwa wahu.

⁷⁰ Nootteeliwa murima vanci-ene woona ni opuha mmosa ni mukhw'awe. Itthu iya, ninnisuka ntoko mihakhu suulupale sa murima ahu, etthu emosa musurukhu wahaawery'aya othuma, olumwenku wahaawery'aya ofuca, okhala wira Muluku onivanhe mahala, mahala ntoko Kristu sikhwenly'awe yeeyo.

⁷¹ Vano, ninvekela wira Nyuwo mukhale ni hiyo voosiis'ula. Munikhaliherye, vano, ni omumula okathi vakhani, ni otthika. Munivahe muteko w'okokhorela muulupale onttarelana. Maana ninvekela, mwa Nsina Nawe, Ole oniixuttihale ovekela vamosa [Munna Branham ni muthukumano anvekela vamosa—Mol.] Tith'ihu muri Wirimu, Nsina Nanyu Nivuwihawe. Omwene Anyu orwe. Otthuna Wanyu wiireye vathi, ntoko Wirimu. Munivahe olelo yooly'ahu ya khula nihiku. Munilevelele sootheka sahu, ntoko hiyo ninaalevelel'ahu ale annitthekela. Muhinihiye omora nehereriwaka, masi munaakiherye sootakhala: Tthiri Omwene ti Wawinyu, n'uweriya, ni ovuwa, mahiku othene. Amen.

⁷² Apwiya yooreeriheni, vano, mpakha owoonani-tho, mwa ntoko...iwoora thanu na xexe ni minuutu miloko miraru. Nvahane matata mmosa ni mukhw'awe; nto ninoowoonani ewoora yaneethanu na xexe ni minuutu miloko miraru. 

*AKHALAKA, AKHWAAKA, AVITHIWAKA,
AHIHIMUWAKA, ARWAAKA* EMK59-0329s
(Living, Dying, Buried, Rising, Coming)

ETTHERANELO YA MUTTHAKA WA PAASIKHA

Mutthak'ola wa Munna William Marrion Branham, opaceryawene olaleeriwe ni Enkelesi voosiisu wa Paasikha nsuwa nikhumaka-ru, mahiku yeettaka 29, mweeri wa Março 1959, oBranham Tabernacle oJeffersonville, Indiana, wAmerika, okuxiwe wo okaravariwa mufitani ya makineti khulempwa wothene ni nntaava n'Enkelesi. Otaphuleliwa nno mw'Emakhuwani okhumiheriwe ni okaiwe ni Voice Of God Recordings.

EMAKHUWA

©2022 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Olopolo mwaha wa ihaakhi sa mwaneene

Ihaakhi sothene sinnaakiheriwa. Eliivuru ila pooti otthittiwa owaani wira mutthu arumeele wala okaiwa, voohilinwa etthu, ntoko ekaruma y'olaleerya Ehapari yooreera ya Yesu Kristu. Eliivuru ila ehitemihiweke, otthittiwa eyaattelo yuulupale, oheliwa muwepisaiti, oheliwa moothukumanyiwa wira ekuxiwe-tho, otaphuleliwa ni mattaava makina, wala orumeeliwa wira ophwanyiwe musurukhu vahikhanle n'utthuniheriwa woolempwa ni Voice Of God Recordings®.

Mwaaphavelaka wiiwa-tho wala ikaruma sikina sikhanelle, xontte mulavule ni:

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org